

## **TERGOV ORGANLARI TOMONIDAN JINOYATLARNI PROFILAKTIKA QILISH FAOLIYATINING AYRIM JIHATLARI**

*Ne'matov Azizbek G'olibjon o'g'li\**

**Аннотация.** Мақолада тергов органларининг жиноятларни профилактика қилишда соҳа олимларининг фикрлари асосида таҳлил қилинган, уларнинг тушунчаси, мазмун-моҳияти, шунингдек тергов органларининг жиноятларни профилактика қилиш соҳасидаги норматив-хуқуқий хужжатлар ўрганилган. Тергов органлари томонидан жиноятнинг профилактика қилиниши масаласига алоҳида эътибор қаратилган. Мақоланинг хулоса қисмида профилактик фаолиятни янги механизмини ташкил қилиш ва уни самарали режалаштириш, жиноятларни барвақт олдини олишда муҳим аҳамият касб этиши ёритилган.

**Калит сўзлар:** жиноятларнинг олдини олиш, жиноятнинг сабаб ва шароитлари, хуқуқбузарликлар профилактикасининг турлари, тергов профилактикаси, тақдимнома, жиноят муҳокамаси.

### **НЕКОТОРЫЕ АСПЕКТЫ ДЕЯТЕЛЬНОСТИ ПРЕДУПРЕЖДЕНИЮ ПРАВОНАРУШЕНИЙ СЛЕДСТВЕННЫХ ОРГАНОВ**

**Аннотация.** В статье анализируются мнения специалистов в области профилактики правонарушений органов дознания, их понятие, содержание, а также нормативно-правовые документы в области профилактики правонарушений органов дознания. Следственные органы уделяют особое внимание вопросу предупреждения правонарушений. В заключительной части статьи поясняется, что большое значение в раннем предупреждении преступлений имеет организация нового механизма профилактической деятельности и ее эффективное планирование.

**Ключевые слова:** профилактика преступлений, причины и условия преступности, виды профилактики преступлений, профилактика расследования, представление, уголовное судопроизводство.

### **SOME ASPECTS OF CRIME PREVENTION ACTIVITIES BY INVESTIGATIVE BODIES**

**Annotation.** The article analyzes the opinions of experts in the field of crime prevention of investigative bodies, their concept, content, as well as normative legal

\* Ўзбекистон Республикаси ИИВ Академияси ўқитувчиси. [info@akadmvd.uz](mailto:info@akadmvd.uz)  
[azizbek\\_nematov\\_696@mail.ru](mailto:azizbek_nematov_696@mail.ru)

documents in the field of crime prevention of investigative bodies. Investigative bodies pay special attention to the issue of crime prevention. In the concluding part of the article, it is explained that the organization of a new mechanism of preventive activities and its effective planning are of great importance in the early prevention of crimes.

**Keywords:** crime prevention, causes and conditions of crime, types of crime prevention, investigation prevention, presentation, criminal trial.

Юридик адабиётларда жиноятларнинг олдини олиш ҳамда жиноятлар профилактикаси тушунчалари бир хил маъноларда қўлланилади. “Профилактика” сўзи юононча “prophilaktikos” сўзидан олинган бўлиб, “сақловчи”, “олдини олувчи”, “бирор ҳодисани олдини олиш учун кўриладиган чоралар” каби маъноларини англатади<sup>1</sup>.

Норматив-хукукий хужжатларда профилактика атамаси ҳукуқ-тартиботни сақлаш ҳамда мустаҳкамлаш, ҳукуқбузарликларни аниқлаш, уларга барҳам бериш, шунингдек ҳукуқбузарликларнинг содир этилиши сабабларини ва уларга имкон берәётган шарт-шароитларни аниқлаш, бартараф этиш мақсадида қўлланиладиган ҳукуқий, ижтимоий, ташкилий ва бошқа чора-тадбирлар тизими<sup>2</sup> сифатида таърифланган.

Ҳукуқбузарликлар профилактикасини амалга ошириш шакллари: ёзма; оғзаки; кўргазмали; амалий ёрдам бериш кабилардан иборат.

Ҳукуқбузарликлар профилактикасининг ёзма шакли, асосан, газета ва журналларда ҳукуқбузарликларнинг сабаб ва шароитлари ҳақида мақолалар, содир этилган ҳукуқбузарликлар тўғрисида хабар, ҳикоя, очерклар чоп этиш, одамлар гавжум бўладиган жойларда ёзма эълонлар осиш, аниқланган ҳукуқбузарликнинг сабаб ва шароитлари, шунингдек ҳукуқбузарликдан жабрланиш эҳтимоли юзасидан фуқароларга огоҳлик ва ҳушёрликка чақиравчи хатлар юбориш, тақдимномалар киритиш, расмий огоҳлантириш, ҳукуқбузарликларнинг содир этилиши сабаблари ва уларга имкон берәётган шарт-шароитлар тўғрисида хабардор қилиш кабиларда намоён бўлади. Ҳукуқбузарликлар профилактикасининг оғзаки шакли сухбат, маъруза, савол-жавоб, радио эшиittiриш, аҳоли гавжум жойлар (масалан, бозорлар, метро бекатлари, супермаркет ёки гиппермаркетлар)да огоҳликка чақиравчи овозли матн тасмасини эшиittiриш кабиларда кузатилади. Ҳукуқбузарликлар профилактикасининг кўргазмали шаклида телевидение ва ижтимоий тармоқлар орқали ҳукуқбузарликлар ҳақида кўрсатувлар, кинофильмлар, видеороликлар тайёрлаб эфирга узатиш, аҳоли гавжум жойларда ҳукуқбузарликлар профилактикаси мазмунига эга плакатлар, эълонлар яратиш, видеороликлар

<sup>1</sup> Ўзбек тилининг изоҳли лугати. Т.:“Ўзбекистон миллий энциклопедияси” Давлат илмий нашриёти, 2008. Т-3. Б-316.

<sup>2</sup> Ўзбекистон Республикасининг “Ҳукуқбузарликларнинг профилактикаси тўғрисида”ти Конуни. Ўзбекистон Республикаси конун хужжатлари тўплами, 2014 й., 20-сон, 221-модда

намойиш қилиш, учрашув, маъруза жараёнларида мультимедиа воситаларидан фойдаланилади. Шундай профилактик тадбирлар борки, улар ҳам оғзаки, ҳам ёзма ва ҳам кўргазмали шаклда амалга оширилиши мумкин (Буларга маъруза ўқиш, якка тартибда сухбат ўтказиш кабиларни мисол қилиб келтириш мумкин). Амалий ёрдам бериш шакли ҳукуқбузарликлар профилактикасининг бошқа шаклларидан ўзига хос жиҳатлари билан ажралиб туради. Бунда ҳукуқбузарликлар профилактикаси субъектлари фуқаролар ва юридик шахсларга ҳукуқбузарликларнинг олдини олишга йўналтирилган хизматлар кўрсатади. Ушбу хизматларга аҳоли ёки юридик шахсларнинг марказий қўриқлаш пультига уланишини ёки қўриқлаш хизматлар орқали уй-жойлар, бино ва иншоатларнинг қўриқланишини таъминлаш кабиларни келтириш мумкин. Хуллас, ҳукуқбузарликлар профилактикасининг турлари, усул ва шакллари ҳукуқбузарликлар профилактикаси фаолиятининг мазмунини ташкил этади. Бу борадаги билимлар ҳукуқбузарликлар профилактикасининг самарали ташкил этилиши ва амалга оширилишини кафолатлайди<sup>3</sup>.

Дастлабки тергов органларининг жиноятларни профилактика қилиш фаолияти ҳукуқбузарликларни олдини олишнинг умумий назарий асослари билан уйғун ҳисобланади, яъни ҳар икки тушунча мазмун-моҳиятига кўра бир-бiri билан узвий боғлиқ ва ўзаро бир-бирини тўлдириб боради. Бироқ, таъкидлаб ўтиш лозимки, тергов органлари бутун бир профилактик фаолиятнинг асосини ташкил қилувчи, унинг йўналишларини белгилашда ҳал қилувчи аҳамиятга эга бўлган жиноятнинг сабаб ва шароитларини аниқлашда муҳим ўрин тутади. Бу масалада рус олим И.Р.Веренчиков, терговчининг жиноятларнинг олдини олиш фаолиятини ўрганишнинг муҳимлиги, унинг жиноятлар ижтимоий профилактикасининг асосий субъекти эканлиги билан белгиланади, унинг дастлабки тергов босқичида жиноятнинг сабаблари ва унга имкон берган шарт-шароитларни аниқлаш бўйича фаолияти жиноятлар ижтимоий профилактикасини амалга оширувчи бошқа субъектлар учун асос бўлиб хизмат қиласи, деб таъкидлаб ўтган<sup>4</sup>.

Жиноят-процессуал ҳукуқига оид ва бошқа юридик адабиётларда тергов органларининг жиноятларнинг олдини олиш фаолиятининг тушунчасига алоҳида таъриф берилмаган. Бироқ, тергов органлари фаолиятининг асосини содир этилган жиноятларни очиш билан бирга жиноятларнинг олдини олиш ҳам ташкил қиласи. Бунда тергов органлари томонидан жиноятнинг сабабларини ва унинг содир этилишига имкон берган шарт-шароитларини аниқлаш мажбурияти

<sup>3</sup> Хўжақулов С.Б. Ички ишлар органларининг ҳукуқбузарликлар профилактикаси фаолияти: Ўқув қўлланма / Масъул мухаррир проф. И. Исмаилов. Т.: Ўзбекистон Республикаси ИИВ Академияси, 2017., Б.-7.

<sup>4</sup> Криминология: Учебник // под ред. проф. Малкова В.Д. – Москва.: 2004 г. стр.-3.

қонун хужжатларининг вазифаларидан бири бўлган жиноятларни олдини олиш чораларини кўришдан иборатдир<sup>5</sup>.

Ўзбекистон юридик энциклопедиясини ишлаб чиқсан ҳукуқшунос олимлар жиноятларнинг олдини олишни жиноят процессининг асосий вазифаларидан бири сифатида қайд этиб, ушбу фаолиятни суриштирувчи, терговчи, прокурор ва суд зиммасига жиноятнинг сабабларини, унинг содир этилишига имкон берган шарт-шароитларни аниқлашдан иборат, деб қайд этишган<sup>6</sup>. Фикримизча, жиноят-процессуал нуқтаи-назаридан мазкур таъриф тўлдирилиши лозим. Жиноят-процессуал кодексининг 297-моддасида: “...суриштирувчи, терговчи, прокурор жиноят ишини тергов қилиш чоғида жиноятнинг сабабларини ва унинг содир этилишига имкон берган шарт-шароитларни аниқлаб чиқиб, тегишли давлат органига, фуқароларнинг ўзини ўзи бошқариш органига, жамоат бирлашмасига, жамоага ёки мансабдор шахсга ана шу сабаб ва шарт-шароитларни бартараф қилиш чораларини кўриш тўғрисида тақдимнома киритади”,-деб қайд этилган. Шу нуқтаи-назардан тергов органларининг жиноятларнинг олдини олиш фаолияти нафақат жиноятнинг сабабларини, унинг содир этилишига имкон берган шарт-шароитларни аниқлаш, балки уларни бартараф қилиш бўйича процессуал чораларни кўришдан ҳам иборат.

Жиноят ҳукуқига оид юридик адабиётларда жиноятларни олдини олиш, алоҳида меъёр сифатида ҳукуқий хулқ-атворни белгиловчи ҳукуқий онг даражасини шакллантириш орқали ижтимоий хавфли ҳаракатлар содир этилмаслигини таъминлаш сифатида таърифланган<sup>7</sup>. Жиноий-ҳукукий нуқтаи-назардан мазкур таърифга қўшиламиз. Чунки, жиноят қонунчилиги орқали муайян хатти-ҳаракатларни содир этганлик учун жавобгарлик белгилаш орқали инсонларда ҳукуқий хулқ-атвор меъёrlари шакллантирилади ва унинг чегаралари ўрнатилади.

Тергов органларининг жиноятларнинг олдини олиш фаолияти доирасида аниқланадиган жиноятларнинг сабаблари ва уларга имкон берган шарт-шароитлар юқорида қайд этилган жиноятларни олдини олишнинг ҳар икки йўналишида ҳам ҳал қилувчи аҳамиятга эга.

Фикримизча, тергов органларининг жиноятларнинг олдини олиш фаолиятини шартли равишда икки бир-бирига узвий боғлиқ бўлган босқичларга бўлиб ўрганиш мақсадга мувофиқ. Биринчи босқичда тергов органлари томонидан дастлабки тергов жараёнида жиноятни содир бўлишига сабаб бўлган

<sup>5</sup> Ўзбекистон Республикасининг Жиноят-процессуал кодексига шархлар. Масъул мухаррир: проф. Ф.А.Абдумажидов. –Т.: ТДЮИ нашриёти, 2009. – Б.-

<sup>6</sup> Ўзбекистон юридик энциклопедияси /нашр учун масъуль Р.А.Мухитдинов ва бошк. Т.:Адолат, 2010. Б. 184.

<sup>7</sup> Ўзбекистон Республикаси Жиноят кодексига шархлар // юридик фанлар доктори, профессор М.Х.Рустамбаев таҳрири остида. Т.:2009., Б.-4.

ҳолатлар ҳамда унга имкон берган шарт-шароитларни аниқлаш вазифаларини киритсак, иккинчи босқичда уларни бартараф этиш, хусусан тақдимнома киритиш, унинг ижросини таъминлаш билан боғлиқ вазифаларни киритамиз.

Юқорида қайд этилган фикрлардан келиб чиқиб тергов органларининг жиноятларнинг олдини олиш фаолиятига қуйидаги муаллифлик таърифини илгари суришни лозим деб ҳисоблаймиз, яъни *тергов органларининг жиноятларнинг олдини олиши фаолияти бу – тергов ҳаракатлари ўтказиши орқали жиноятларнинг сабабларини, уларнинг содир этилишига имкон берган шарт-шароитларни аниқлаши, шунингдек уларни бартараф қилишига қаратилган жиноят-процессуал ҳатти-ҳаракатлар мажмуидир.*

Тергов органлари томонидан жиноятларнинг олдини олиш фаолиятини ташкил этиш, олиб боришдан кўзланган асосий мақсадлар жиноят ишларини юритишнинг жиноят-процессуал қонунларда белгиланган мақсадлари билан уйғундир. Жиноят ишларини юритишнинг жиноят-процессуал қонунларда белгиланган тартиби уч мақсадга хизмат қиласди: биринчидан, қонунийликни мустаҳкамлашга – яъни, жиноят ишларини юритишда Конституция ва қонунларнинг устунлигини эътироф этишга; иккинчидан, жиноятларнинг олдини олишга – яъни, судланувчи ва бошқа шахсларга ахлоқий-рухий таъсир кўрсатиб, улар томонидан янги жиноят содир этишининг олдини олишга; учинчидан, шахс, давлат ва жамият манфаатларини ҳимоя этишга – жиноят-процессуал қонун ҳужжатлари жиноят туфайли заарар ёки зиён етган алоҳида шахслар, давлат ёки жамият манфаатларини ҳимоя этишга, шу жумладан, етказилган моддий ва маънавий зиённи қоплашга хизмат қиласди<sup>8</sup>.

Фикримизча, тергов органларининг жиноятларни олдини олиш фаолиятининг мақсадларини қуйидаги тартибда кенгроқ ифода этиш мақсадга мувофиқ:

- жиноятларнинг сабабларини аниқлаш ва уларни содир этилишига имкон берган шарт-шароитларни бартараф қилиш;
- фуқаролар хавфсизлигини таъминлаш, уларни жиноий тажовузлардан ҳимоя қилиш;
- ижтимоий хавфли қилмиш оқибатларини бартараф қилиш;
- хуқуқ-тартиботни сақлаш ва қонунийликни таъминлаш;
- жиноятларнинг содир этилиши сабабларини ва уларга имкон берадиган шарт-шароитларни аниқлаш, бартараф этиш баробарида жиноятларни барвақт олдини олиш фаолиятини зарур ахборотлар билан таъминлаш;

<sup>8</sup>Ўзбекистон Республикасининг Жиноят-процессуал кодексига шархлар. Умумий қисм (илмий-амалий шарх) / Масъул мухаррир: профессор Б.Х.Пўлатов. – Тошкент: Янги аср авлоди, 2014. – Б.-7.

- ижтимоий хавфли қилмиш содир этган шахсларнинг, бундай хатти-ҳарақатларни содир этишга мойил бўлган шахсларнинг жиноий фаолиятларига чек қўйиш.

Қайд этиш лозимки, тергов органларининг жиноятларнинг олдини олиш фаолияти юридик фан тизимида муҳим масала ҳисобланади. Айниқса, жиноят ҳуқуқи, жиноят-ижроия ҳуқуқи фанлари жиноятларни олдини олиш фаолиятининг ажралмас қисмини ташкил қиласди. Жиноят ҳуқуқи содир этилган қилмишнинг жиноят эканлигини аниқлаш ва шу жиноят учун жазо тайинлашни тартибга солса, жиноят-процессуал ҳуқуқи содир этилган жиноят юзасидан суриштирув, дастлабки тергов органларининг суриштирув ва тергов ишларини олиб бориши ишни судда кўриш билан боғлиқ бўлган фаолиятини тартибга солади. Жиноят ижроия ҳуқуқи эса, жиноят содир этганлиги муносабати билан жиноий жазога ҳукм қилингандарнинг жазосини ижро этишдан келиб чиқсан муносабатларни тартибга солади. Мазкур фанларнинг ўзаро боғлиқлиги, энг аввало, улар вазифаларининг, яъни жиноятчиликка қарши курашнинг умумийлигига ҳисобланади. Шундан келиб чиқсан ҳолда жиноят ҳуқуқининг ҳам, жиноят-ижроия ҳуқуқининг асосини ташкил қилувчи кодексларнинг асосий вазифаларида айнан жиноятларнинг олдини олиш қайд этилган. Жумладан, Жиноят кодексининг вазифалари шахсни, унинг ҳуқуқ ва эркинликларини, жамият ва давлат манфаатларини, мулкни, табиий муҳитни, тинчликни, инсоният хавфсизлигини жиноий тажовузлардан қўриқлаш, шунингдек жиноятларнинг олдини олиш, фуқароларни республика [Конституцияси](#) ва қонунларига риоя қилиш руҳида тарбиялашдан иборат деб белгиланган<sup>9</sup>. Жиноят-ижроия кодексининг вазифаларида эса жазо ижросини таъминлаш, маҳкумларни ахлоқан тузатиш, жиноятлар содир этилишининг олдини олиш каби муҳим мақсадлар қайд этилган<sup>10</sup>.

Тергов органларининг жиноятларнинг олдини олиш фаолиятини самарали ташкил қилиш жамият ва давлат, фуқароларнинг хавфсизлиги ва саломатлиги учун ҳам бирдек долзарб ҳисобланади. Шу нуқтаи-назардан республикамизда жиноятларнинг олдини олиш фаолиятининг ҳуқуқий асослари тегишли қонунлар, фармонлар ва қарорлар билан мустаҳкамланган ва такомиллаштирилиб келинмоқда. Бугунги кунда тергов органлари томонидан жиноятларнинг олдини олиш фаолиятининг икки муҳим, бевосита ҳуқуқий асослари, жиноят ва жиноят-процессуал қонунлари янада такомиллаштирилмоқда. Ўзбекистон Республикаси Президентининг 2018 йил 14 май куни қабул қилинган «Жиноят ва жиноят-процессуал қонунчилиги тизимини тубдан такомиллаштириш чора-тадбирлари тўғрисида»ги ПҚ 3723-сон қарори

<sup>9</sup> Ўзбекистон Республикасининг Жиноят кодекси 2-модда

<sup>10</sup> Ўзбекистон Республикасининг жиноят-ижроия кодекси 2-модда

билин жиноят ва жиноят-процессуал қонунчиликни такомиллаштиришнинг мутлақо янги устувор йўналишларини ишлаб чиқиш ва амалга ошириш мақсадида қўйидагилар, биринчидан, Ўзбекистон Республикасининг Жиноят ва жиноят-процессуал қонунчилигини такомиллаштириш концепцияси тасдиқланди; иккинчидан, Ўзбекистон Республикаси Бош прокуратураси, Олий суди ва Ички ишлар вазирлигининг қўйидагиларни назарда тутувчи «Электрон жиноят иши» дастлабки лойиҳаси доирасида амалга оширилаётган жиноят ишларини юритиш тартибини босқичма-босқич рақамлаштириш тўғрисидаги таклифи қабул қилинди; учинчидан, Ўзбекистон Республикасининг Жиноят ва жиноят-процессуал қонунчилигини такомиллаштириш бўйича идоралараро комиссия ташкил этилди ва унинг таркиби тасдиқланди; тўртинчидан, идоралараро комиссия ва «электрон жиноят иши» дастлабки лойиҳасини амалга ошириш бўйича ишчи гурухларнинг вазифалари белгиланди; бешинчидан, «электрон жиноят иши» дастлабки лойиҳасини амалга ошириш шартлари ва талаблари белгиланди<sup>11</sup>. Қайд этиш жоизки, ҳозирда республикамида жиноятчиликка қарши курашиш, хусусан жиноятларни олдини олиш борасида жиноят ҳамда жиноят-процессуал қонунлардан ташқари бир қатор норматив-хуқуқий ҳужжатлар ҳам қабул қилинганки, мазкур норматив-хуқуқий ҳужжатлар жиноятларнинг олдини олиш фаолиятининг хуқуқий асосларини ташкил қилиши билан бирга, ушбу тизимда бутун бир механизм ишлашини таъминламоқда.

Жумладан, Ўзбекистон Республикасининг “Ички ишлар органлари тўғрисида”ги, “Хукуқбузарликларни олдини олиш тўғрисида”ги, “Хукуқбузарликлар профилактикаси тўғрисида”ги қонунлари, Ўзбекистон Республикаси Президентининг “Ички ишлар органларининг фаолияти самарадорлигини тубдан ошириш, жамоат тартибини, фуқаролар хукуқлари, эркинликлари ва қонуний манфаатларини ишончли ҳимоя қилишни таъминлашда уларнинг масъулиятини кучайтириш чора-тадбирлари тўғрисида”, “Ўзбекистон республикаси жамоат хавфсизлиги концепциясини тасдиқлаш ва уни амалга ошириш чора-тадбирлари тўғрисида”, “Ўзбекистон Республикасида коррупцияга қарши курашиш тизимини такомиллаштириш бўйича қўшимча чора-тадбирлар тўғрисида”, “Ўзбекистон Республикасини янада ривожлантириш бўйича харакатлар стратегияси тўғрисида”ги Фармонлари, шунингдек Ўзбекистон Республикаси Президентининг “Хукуқбузарликлар профилактикаси ва жиноятчиликка қарши курашиш тизимини янада такомиллаштириш чора-тадбирлари тўғрисида”, “Жамоат хавфсизлигини таъминлаш самарадорлигини ошириш бўйича қўшимча чора-тадбирлар тўғрисида”ги фармон ва қарорлари жиноятларнинг олдини олиш фаолиятининг муҳим хуқуқий ҳамда ташкилий

<sup>11</sup> Ўзбекистон Республикаси Президентининг 2018 йил 14 май куни қабул қилинган «Жиноят ва жиноят-процессуал қонунчилиги тизимини тубдан такомиллаштириш чоратадбирлари тўғрисида»ги ПК 3723-сон карори // <http://lex.uz/docs/3735818> (Ўзбекистон Республикаси Қонун ҳужжатлари маълумотлари миллый базаси.)

асослари сифатида қўлланилмоқда. “Жиноятларнинг сабаблари ва уларнинг содир этилишига имкон берган шарт-шароитларни муҳокама қилиш тартиби тўғрисидаги низомни тасдиқлаш ҳақида” ги Ўзбекистон Республикаси Вазирлар Маҳкамасининг 2021 йил 10 сентябрдаги №565-сонли қарорида “Содир этилган жиноятларнинг келиб чиқиш сабаблари ва уларнинг содир этилишига имкон яратиб берган шарт-шароитларни «Жиноятга қарши курашиш ҳақиқати ваadolati» тизими асосида жамоатчилик ўртасида муҳокама қилиш, бу борадаги ҳуқуқбузарликлар профилактикасини амалга оширувчи ва унда иштирок этувчи органлар, муассасаларнинг ўзаро хамкорлигини таъминлаш ҳамда уларнинг фаолиятини мувофиқлаштириш” асосий мақсад этиб белгиланганлигини кўришимиз мумкин. Ушбу қарорда “Жиноятларнинг сабаблари ва уларнинг содир этилишига имкон берган шарт-шароитларни муҳокама қилиш қонунийлик, ошкоралик, жамоатчилик иштирокини таъминлаш, одиллик, шахснинг шаъни ва қадр-қимматини ҳурмат қилиш, тизимлилик, айбиззлик презумпциясига риоя этиш, ишонтириш усулининг устуворлиги каби принциплар асосида амалга оширилади.”<sup>12</sup> деб белгилаб қўйилди.

Хулоса ўрнида шуни таъкидлаш лозимки, жиноятларни профилактика қилиш фаолиятида тергов органларининг асосий уйғунлаштириш ўз навбатида жиноятларнинг муваффақиятли профилактика қилинишини таъминлайди. Дастребки тергов органлари фаолияти нуқтаи назаридан келиб чиқиб, жиноятларни профилактика қилишда янгича ёндашув ва механизм ишлаб чиқиш ва шу орқали жиноятчиликнинг хар қандай қўринишини профилактика қилинишига асос бўлиб хизмат қиласи. Хозирги вақтга келиб, тергов органларининг жиноятларни профилактика қилиш фаолиятида жиноятларни профилактика қилишнинг механизмини ишлаб чиқиши тақазо этмоқда.

Суриштирув, тергов, прокуратура ва суд органларнинг жиноят содир этилишига имкон берган сабаблар ва шарт-шароитларни бартараф этиш фаолияти юзасидан ўрганилган муҳим маъбуломотлар асосида қуйидаги хулосаларга келинди:

*биринчидан*, жиноятнинг сабаблари ва унга имкон берган шароитларни аниқлаб бартараф этишнинг янги механизмини Ўзбекистон Республикаси Вазирлар Маҳкамасининг 2021 йил 10 сентябрдаги №565-сонли “Жиноятларнинг сабаблари ва уларнинг содир этилишига имкон берган шарт-шароитларни муҳокама қилиш тартиби тўғрисидаги низомни тасдиқлаш ҳақида” ги қарори талабаридан келиб чиқиб, “Содир этилган жиноятларнинг келиб чиқиш сабаблари ва уларнинг содир этилишига имкон яратиб берган шарт-шароитларни «Жиноятга қарши курашиш ҳақиқати ваadolati» тизими асосида ишлаб чиқиши ва амалга тадбиқ этиш;

<sup>12</sup> Ўзбекистон Республикаси Вазирлар Маҳкамасининг Қарори №565-сон 2021 йил 10 сентябрь 1-боб 5-банд.

иккинчидан, Ўзбекистон Республикаси МЖТКнинг 196-моддасини (“Хукуқбузарлик сабаблари ва шарт-шароитларини бартараф этиш юзасидан Ўзбекистон Республикаси Миллий гвардияси ва ички ишлар органларининг ёзма тақдимномаларини бажариш чораларини кўрмаслик”) тўлдириш, яни Ўзбекистон Республикаси ЖПКнинг 38 ва 344-моддаларига асосланиб, “Хукуқбузарлик сабаблари ва шарт-шароитларини бартараф этиш юзасидан Суриштирувчи, терговчи ва прокурорнинг ёзма тақдимномаларини бажариш чораларини кўрмаслик” деб ўзгартириш таклиф этилади;

учинчидан, жиноятларни тергов қилиш даври мобайнида тергов профилактик фаолиятни тизимлаштириб такомиллаштириш, жиноятларни барвақт олдини олиш фаолиятида давлат ва фуқароларнинг ўзини ўзи бошқариш органлари, жамоат бирлашмалари, мансабдор шахслар билан ҳамкорликнинг самарали йўналишларини, механизмларини ишлаб чиқиш, шунингдек оммавий ахборот воситалари ҳамда ижтимоий тармоқларда жиноятлар профилактикаси, хусусан жиноят содир этилишига имкон берадиган сабаблар ҳамда шарт-шароитлар тўғрисидаги дастурлар ишлаб чиқиб намоиш этиш, фуқароларнинг ҳуқуқий онги ва маданиятини юксалтириш, огоҳликка чақириш орқали виктимологик профилактикани ташкил қилишда асос сифатида хизмат қиласади.

#### **Иқтибослар/Сноски/References:**

1. Ўзбек тилининг изоҳли луғати. Т.:“Ўзбекистон миллий энциклопедияси” Давлат илмий нашриёти, 2008. Т-3. Б-316.
2. Ўзбекистон Республикасининг “Хукуқбузарликларнинг профилактикаси тўғрисида”ги Қонуни. Ўзбекистон Республикаси қонун ҳужжатлари тўплами, 2014 й., 20-сон, 221-модда
3. Хўжакулов С.Б. Ички ишлар органларининг ҳукуқбузарликлар профилактикаси фаолияти: Ўқув қўлланма / Масъул муҳаррир проф. И. Исмаилов. Т.: Ўзбекистон Республикаси ИИВ Академияси, 2017., Б. 7.
4. Криминология: Учебник // под ред. проф. Малкова В.Д. – Москва.: 2004 г. стр.-3.
5. Ўзбекистон Республикасининг Жиноят-процессуал кодексига шарҳлар. Масъул муҳаррир: проф. Ф.А.Абдумажидов. –Т.: ТДЮИ нашриёти, 2009. – Б.-
6. Ўзбекистон юридик энциклопедияси /нашр учун масъул Р.А.Мухитдинов ва бошк. Т.:Адолат, 2010. Б. 184.
7. Ўзбекистон Республикаси Жиноят кодексига шарҳлар // юридик фанлар доктори, профессор М.Х.Рустамбаев таҳрири остида. Т.:2009., Б. 4.
8. Ўзбекистон Республикасининг Жиноят-процессуал кодексига шарҳлар. Умумий қисм (илмий-амалий шарҳ) / Масъул муҳаррир: профессор Б.Х.Пўлатов. – Тошкент: Янги аср авлоди, 2014. – Б. 7.
9. Ўзбекистон Республикасининг Жиноят кодекси 2-моддаси
10. Ўзбекистон Республикасининг жиноят-ижроия кодекси 2-моддаси
11. Ўзбекистон Республикаси Вазирлар Маҳкамасининг Қарори №565-сон 2021 йил 10 сентябрь 1-боб 5-банд.